

Permulaan kebangkitan atlet wanita - Marina

KUALA LUMPUR 10 Mac - Bekas ratu trek olahraga negara Datuk Marina Chin menyifatkan kebangkitan atlet olahraga wanita negara sudah bermula menerusi kemunculan generasi baharu berbakat kebelakangan ini.

Merujuk kepada kejayaan Zaidatul Husniah Zulkifli, 24, memecahkan rekod kebangsaan

100 meter berusia 24 tahun milik G. Shanti, Ketua Kontinjen Malaysia ke Sukan SEA 2017 itu melihat terdapat sinar di penghu-



MARINA CHIN

jung terowong yang selama ini gelap untuk olahraga negara terutama dalam segmen wanita.

“Sudah lama saya menunggu saat ini. Malaysia ketandusan atlet wanita bertahun-tahun lamanya terutama dalam acara pecut. Saya bangga dengan pencapaian awal yang ditunjukkan atlet wanita kita ketika ini.

“Bayangkan ini baru bulan Mac dan mereka masih berada dalam fasa kedua persiapan tetapi sudah mampu mencatat masa bawah 12 saat. Saya menjangkakan menjelang Sukan SEA 2017 Ogos nanti, catatan masa mereka akan menjadi lebih baik,” kata pemenang 100m berpagar dan 200m pecut Sukan SEA 1977 di Kuala Lumpur itu.

Bekas Pengetua Sekolah Sukan Bukit Jalil berusia 62 tahun itu menegaskan, beliau bukan sahaja merujuk kepada pencapaian Zaidatul tetapi berkata olahraga negara kini sudah memiliki empat pelari wanita yang mampu mencatat masa bawah 12 saat - sesuatu yang dahulunya sukar dilihat secara serentak.

“Selain Zaidatul, kita ada Siti Fatimah Mohamad, Komalam Shally dan Shereen Samson Vel-labouy yang juga mampu catat masa bawah 12 saat. Mereka bersaing antara satu sama lain secara sihat dan ini bagus untuk mereka mencatat masa lebih baik,” tegasnya.

Ditanya mengenai ketiadaan pengganti dalam acara kegemarannya satu ketika dahulu iaitu



MALAYSIA boleh mengimpikan untuk menguasai acara 100m wanita Sukan SEA 2017 kerana kini memiliki jaguh seperti Zaidatul Husniah Zulkifli (kanan) dan S. Komalam Shally (tengah) yang mampu berlari di bawah 12 saat.

100m lari berpagar wanita, Marina menafikannya kerana ada jaguh dalam pembikinan bakal meniti kegemilangan tidak lama lagi.

“Atlet seperti Raja Nursheena

Raja Azhar kini sudah menunjukkan banyak peningkatan, cuma pencapaiannya melakukan bawah 14 saat beberapa kali tidak dilaporkan. Saya percaya dia mampu menggantikan tem-

pat saya satu hari nanti,” tegasnya.

Pada era 70-an, Marina begitu dikagumi apabila berjaya meraih tujuh emas sepanjang penyertaannya dalam Sukan SEA.